

Na osnovu člana 1. Zakona o štrajku ("Službene novine Federacije BiH", br. 14/00) i člana 20. Statuta Univerziteta u Sarajevu, Centralni odbor Sindikata Univerziteta u Sarajevu, dana, 06.05.2006. godine, broj 10/09 donosi:

PRAVILNIK O ORGANIZACIJI VOĐENJA ŠTRAJKA

OSNOVNE ODREDBE

Član 1.

Ovim Pravilnikom se reguliše postupak za organizovanje i vođenje štrajka od strane Sindikata, prava radnika u štrajku, pregovori, završetak štrajka, te preciziraju osnovni pojmovi koji se koriste u Pravilniku, kao i druga bitna pitanja.

Član 2.

Štrajk je organizovani prekid rada koji zaposleni organizuju radi zaštite svojih profesionalnih, ekonomskih i socijalnih prava i interesa po osnovu rada.

Sindikat ima pravo pozvati na štrajk i provesti ga radi zaštite i ostvarivanja prava i interesa svojih članova.

Član 3.

Štrajk se može organizovati samo u skladu sa važećim zakonskim propisima.

Član 4.

Zaposleni slobodno odlučuju o svom učešću u štrajku.

Organizovanje i učestvovanje u štrajku organizovanom u skladu sa odredbama zakona, ne predstavlja povredu ugovora o radu.

NADLEŽNOST ZA ORGANIZOVANJE I VODJENJE ŠTRAJKA I VRSTE ŠTRAJKA

Član 5.

Štrajk se može organizovati na nivou Fakulteta i Akademija ili kao generalni štrajk na nivou Univerziteta u Sarajevu.

Štrajk se može organizovati i kao štrajk upozorenja, u trajanju od jedan čas.

Član 6.

Odluku o stupanju u štrajk donosi Centralni odbor Sindikata Univerziteta u Sarajevu posle provedenog pismenog izjašnjavanja zaposlenih na Univerzitetu u Sarajevu (članica SUNSA).

Organizaciju i pokretanje štrajka na nivou Fakulteta ili Akademije vrši Izvršni odbor Sindikata te ustanove.

Centralni odbor Sindikata Univerziteta u Sarajevu donosi odluku o pokretanju generalnog štrajka posle pismenog izjašnjavanja članova sindikata i zaposlenih u institucijama koje su se udružile u Sindikat.

MJESTO I ULOGA ŠTRAJKAČKOG ODBORA

Član 7.

Odlukom o stupanju u štrajk utvrđuju se:

1. zahtjevi zaposlenih,
2. vrijeme početka štrajka,
3. mjesto okupljanja učesnika u štrajku, pri čemu mjesto okupljanja ne može biti izvan kruga ustanove u kojoj se štrajka,
4. sastav štrajkačkog odbora koji vodi štrajk.

Član 8.

Štrajkački odbor je dužan da u pismenoj formi najavi Vladi Kantona Sarajevo i osnivaču odluku o stupanju u štrajk u roku od deset dana prije početka štrajka, a ako je riječ o štrajku upozorenja taj rok je 24 časa.

Član 9.

Štrajkački odbor u ime Centralnog odbora Sindikata Univerziteta u Sarajevu, od dana najave štrajka i za vrijeme štrajka, vodi sa poslodavcem pregovore o sporazumnom rješenju spora.

Član 10.

Štrajkački odbor i zaposleni koji učestvuju u štrajku ne smiju sprječavati zaposlene koji ne učestvuju u štrajku da rade.

Član 11.

Članovi štrajkačkog odbora ne mogu se odrediti da rade za vrijeme štrajka.

Član 12.

Štrajkački odbor rukovodi cjelokupnim štrajkom, prati da li se štrajk odvija u redu i na zakonit način, upozorava nadležna tijela na pokušaje sprječavanja i ometanja štrajka, kontaktira sa nadležnim tijelima, te obavlja druge poslove.

Član 13.

Štrajkački odbor je dužan razmotriti svaku inicijativu za mirno rješenje spora koju uputi poslodavac te na nju odgovoriti u onom obliku u kojem mu je upućena.

MINIMALNI PROCES RADA

Član 14.

Štrajk ne može početi prije nego se obezbijedi minimalni proces rada u skladu sa zakonom, s obzirom da je ovaj Sindikat organizovan za oblast visokog školstva koja predstavlja djelatnost od posebnog javnog i društvenog interesa.

Ministarstvo za obrazovanje i nauku određuje prijeko potrebne poslove koji se moraju neprekidno obavljati.

Štrajkački odbor i poslodavac, na prijedlog poslodavca, sporazumno izrađuju i donose pravila o poslovima koji se ne smiju prekidati za vrijeme štrajka.

Pri određivanju poslova koji se ne smiju prekidati treba voditi računa da se njima obuhvati najmanji mogući broj zaposlenih a da se poslovi pravilno i dobro izvrše.

Štrajkački odbor je dužan da Ministarstvo za obrazovanje i nauku dostavi imena zaposlenih koji će raditi za vrijeme štrajka radi osiguravanja minimalnog procesa rada.

Član 15.

Štrajk se najavljuje Ministarstvu za obrazovanje i nauku i osnivaču u zakonom određenom vremenskom roku, dostavljanjem odluke o stupanju u štrajk i izjave o načinu osiguravanju minimuma procesa rada .

SARADNJA SA POSLODAVCEM

Član 16.

Štrajkački odbor je dužan da za vrijeme štrajka surađuje sa poslodavcem radi osiguravanja minimuma procesa rada.

Član 17.

Zaposleni koji obavljaju poslove minimalnog procesa rada, dužni su da za vrijeme štrajka izvršavaju naloge poslodavca.

Član 18.

Zaposleni koji učestvuju u štrajku organizovanom u skladu sa zakonom, ostvaruju osnovna prava iz radnog odnosa, osim prava na zaradu.

PRESTANAK ŠTRAJKA

Član 19.

Štrajk prestaje :

1. na osnovu pismene odluke organizatora štrajka koja se dostavlja Ministarstvu za obrazovanje i nauku i oglašava na mjestu za objavljivanje,
2. na osnovu sporazuma Ministarstva za obrazovanje i nauku i Sindikata, o kojem je Sindikat dužan, na primjeren i moguć, način upoznati radnike u štrajku.

PRELAZNE I ZAVRŠNE ODREDBE

Član 20.

Sindikalne organizacije Fakulteta i Akademija i Centralni odbor Sindikata Univerziteta u Sarajevu dužni su da prilikom organiziranja i vođenja bilo koje vrste štrajka postupati u skladu sa ovim Pravilnikom.

Član 21.

Izmjene i dopune ovog Pravilnika vrše se po proceduri po kojoj se donosi.

Član 22.

Po jedan primjerak ovog Pravilnika dostavlja se svakoj od organizaciji Sindikata Fakulteta i Akademija, a jedan primjerak će se dostaviti Ministarstvu za obrazovanje i nauku.

Predsjednik Centralnog odbora Sindikata Univerziteta u Sarajevu

Prof. dr. Berko Zečević